

Zum Aufführungsrecht

- Das Recht zur Aufführung erteilt der **teaterverlag elgg**, CH-3123 Belp
Tel. + 41 (0)31 819 42 09. Fax + 41 (0)31 819 89 21
www.theaterverlage.ch / information@theaterverlage.ch
Öffnungszeiten:
Montag - Freitag von 09.00 bis 11.30 Uhr & 13.30 bis 17.00 Uhr
- Der Bezug der nötigen Texthefte - Anzahl Rollen plus 1 - berechtigt nicht zur Aufführung.
- Es sind darüber hinaus angemessene Tantièmen zu bezahlen.
- Mit dem Verlag ist *vor den Aufführungen* ein Aufführungsvertrag abzuschliessen, der festhält, wo, wann, wie oft und zu welchen Bedingungen dieses Stück gespielt werden darf.
- Auch die Aufführung einzelner Teile aus diesem Textheft ist tantièmenpflichtig und bedarf einer Bewilligung durch den Verlag.
- Bei eventuellen Gastspielen mit diesem Stück, hat die *aufführende Spielgruppe* die Tantième zu bezahlen.
- Das Abschreiben oder Kopieren dieses Spieltextes - auch auszugsweise - ist nicht gestattet (dies gilt auch für Computerdateien).
- Übertragungen in andere Mundarten oder von der Schriftsprache in die Mundart sind nur mit der Erlaubnis von Verlag und Verfasser gestattet.
- Dieser Text ist nach dem Urheberrechtsgesetz vom 1. Juli 1993 geschützt. Widerhandlungen gegen die urheberrechtlichen Bestimmungen sind strafbar.
- Für Schulen gelten besondere Bestimmungen.

"Es gibt Leute, die ein Theaterstück als etwas "Gegebenes" hinnehmen, ohne zu bedenken, dass es erst in einem Hirn erdacht, von einer Hand geschrieben werden musste.“

Rudolf Joho

Elisabeth Baumgartner

Ueli der Chnächt

Bärndütsches Spiel i 4 Akte - nach em Gotthelf
Bearbeitung von Rudolf Stalder

Besetzung 5D/ 5H

Bild Bauernstube

«Nume nid z viel verspräche, de brucht me ou nüt z halte.»

Ueli wird Meisterknecht auf dem heruntergewirtschafteten Hof des Glunggenbauern Joggeti. Er trifft dort auf eine weitgehend feindselige Umgebung. Einzig die Bäuerin und Vreneli, eine uneheliche Magd, meinen es gut mit ihm. Mit der Zeit bemerken aber alle, dass Ueli ein fähiger Meisterknecht ist, und Elisi, Joggelis Tochter, will sich mit ihm vermählen. Anlässlich eines Kuraufenthalts lernt diese jedoch einen vermeintlich reichen Baumwollhändler kennen und heiratet diesen. Ueli interessiert sich mehr für Vreneli.

Unter der Vermittlung der Bäuerin stimmt Vreneli einer Heirat zu. Zum Schluss wird Ueli Pächter auf dem Glunggenhof, da keine fähigen Nachkommen da sind.

*«U myne alte Gspane möcht i zeige, dass o nes mingersch
Pürschteli öppis cha wärde, we s i die rächte Häng chunnt.»*

Personen

<i>Joggeli,</i>	Glunggenbauer
<i>Base,</i>	seine Frau
<i>Elisi,</i>	ihre Tochter
<i>Johannes,</i>	ihr Sohn, Wirt
<i>Trinette,</i>	seine Frau
<i>Vreneli,</i>	junge Verwandte
<i>Ueli,</i>	Meisterknecht
<i>Bodenbauer</i>	
<i>Mädi,</i>	junge Magd
<i>Baumwollhändler</i>	

Ort

Emmental

Zeit

1830-1850

Elisabeth Baumgartner ist hier ein vorzügliches Konzentrat der Haupthandlung des grossen Romans gelungen, das Gotthelf nicht verwässert. Das Stück war bis heute in keinem Verlag erschienen. Es ist 1937 entstanden.

Erster Akt

Joggeli steckelt in der Stuber herum, die Base rüstet, Elisi sitzt auf dem Ofentritt und zieht Chrälli an einen Faden.

Joggeli

Das wä de scho ds Tüfels - we sie nid chämi.

Base

Eh, da wett i itz nid scho verzable. – We der für hüt abgmacht heit, so würde si de wohl arücke. Oemel süscht het der Vetter im Bode es Wort gha, wo me druf het chönne gah. U dass er is der neu Chnächt säber wott bringe, isch es guets Zeiche. E leide Bursch hänkt is dä nid a.

Joggeli

Er het mer o nid übel i d Ouge gschine, aber mi cha si trumpiere. Es düecht mi itz bal, der Vetterma heig mer ne nume wohl fascht grüemt. Wen er e settige Usbund wä, so hätt er ne däich sälber bhalte. Uf all Fäll wirde n ihm passe.

Base

Häb de chly Sorg. Wen er scho vo Afang a ds Misstroue muess gspüre, so het er o ke Viduz für az fah. U mir hätti doch sövu bitterübel e rächti Hülf nötig. So cha s doch nümme gah.

Joggeli

Die Burerei erleidet mer sowieso wie chalts Chrut. Wen i nid no Gülti hätt, so müsst i gnue tue wie ne Hung. U das uf eme uszahlte Hof obe!

Base

Mir hätti em Johanes nie sölle nahlah, dass er het afah wirte.

Joggeli

So! Wär het s erzwängt, für ne i dsWältsche z tue? U wär het e tüfels Huffe druffe gha, dass er ischt e Heer worde? Jtz ischt er schi halt a ds Wohlläbe gwahnet. Eine, wo n es Chini un e Aecke het wie ne Chänsma, chunnt schwärli meh cho bure u bösha. D Trinette wurd mer d Nase no rümpfe!

Elisi

Ja, si het scho wieder es neus Tschöpli. E Luxus trybt die! Da wird nüt borget. U dihr heit ere o zue, was der cheut. U ig soll de gäng nume hingerabnäh.

- Base* Es düecht mi, du hättisch nüt z chlage!
- Elisi* Z rüehme o nid! - Meinscht allwäg, i heig's nid gseh, wie d ere e Hampfele Neutaler gstreckt hescht, wo sie ischt da gsy u Johanes ischt o gäng hinger Drättin wäge Gäld. Mis grünsydige Tschöpli ha n i nume so müesse erchäre! Dihr mögit mir eifach nüt göinne, süscht hättit der der Hof lengste verchouft. Derby wüssit der genau, dass i die grobi Choscht nid ma verlyde u mer der Gstank vom Stall übel macht!
- Joggeli* Vo däm red mer nid, Meitli! My Aetti tät si ja im Grab umchehre.
- Base* Un i hätt z Tod Längizyi! U de sälber nid emal meh es Gägeli Anke chönne mache u sälber kes Tröpfli Nidle meh ha u am Aend no d Eier müesse chouffe. Das wett i nid erläbe!
- Elisi* Dihr däichert halt gäng nume a euch. Am liebschte wär s ech, wen i niene meh wär, dass der alls em Johanes u sym Pflartsch chönntit zueha. - Aber das tue nech no lang nid zum Gfalle, äxpräss-hüratnen i.
- Joggeli* Wär wett e settigi Gränne näh! ***Elisi beginnt zu schnäppen.***
- Base* Hör uf, Joggeli, es ischt gar es epfindligs. Tue jtz nid plääre, Elisi! Mi het ja Sorg zue der u ma der d Sach göinne. Im Hingerstube-Glasshaft ischt no e Chueche, chaischt e Bitz vo däm ga näh.
- Elisi* U da die guldig Armspange, wo d mer versproche hescht?
- Base* Ha muescht se de, Zwänge, was de bischt!
- Vreneli* ***öffnet die Türe. Elisi nach der Hinterstube ab.*** Es ischt es Fuehrwärch zueche gfahre.
- Joggeli* So! Sy si doch itz cho:
- Base* Mach mer der neu Chnächt nid scho hüt schlüche, hescht ghört!
- Joggeli* Mi wurd de mit däm sölle umgah wie mit eme unghalete Ei! ***Ab.***

- Base* Es isch mer ganz bang.
- Vreneli* **hat inzwischen den Tisch abgeräumt.** I soll däich i der Hingerstube z wägmache?
- Base* Ja, u tue mer de awänge. I wett de nid, dass der Vetter meinti, mir hätt s nid oder möchti s de Lüte nid gönne.
- Vreneli* Die ässe wäger nid alls, was i gchochet ha! Der neu Meischterchnächt wird chuum e glismete Mage ha.
- Base* U bring deafe e Tropf Wy, Vreneli. **Vreneli ab. Bodenbauer, Ueli, Joggeli treten ein.** Gottwilche, Vetterma! Gseht me di o ume einischt?
- Bodenbauer* Gottwilche, Base! - Wo wohl, du bisch no alli munteri.
- Base* Grad z rühme manglet s nid! I gspüre so, dass i nimme zwänggi bi. - Eh, u das wird itz der neu Meischterchnächt sy? Gottwilche - **Reicht ihm die Hand.**
- Bodenbauer* Ja, das wär jtzt der Ueli.
- Base* So, Gottwilche, Ueli! **Schaut ihn wohlwollend an.** Wo wohl, we de so ne fromme bischt wie ne tolle, de chunnt s guet!
- Ueli* I will ds möglichschste tue.
- Joggeli* Nume nid z viel verspräche u nid z gly rühme.
- Base* Joggeli!
- Bodenbauer* Ueli ischt süscht nid dä, wo ds Muu z voll nimmt.
- Joggeli* He, mi wird no öppis dörfe säge.
- Bodenbauer* Es het jedes hert gha, dass Ueli gange ischt.
- Base* Das ischt ömu es guets Zeiche, oder öppe nid?
- Joggeli* I gibe nid viel uf settigs. - Es wird si ja de wyse...
Vreneli bringt Wein, Elisi mit einem Stück Torte in der Hand, Vreneli grüßt und schenkt ein.
- Base* Das ischt itz üersch Elisi. Chumm, grüss der Vetter!
- Bodenbauer* Potz, o scho tusigwüchig! Grüess di, Baseli!
- Elisi* Bongschur Gusäng!
- Bodenbauer* Bischt du so nes gherrscheligs! -

- Base* Es ischt halt im Wältsche gsy.
- Bodenbauer* Isch es nid zwäg, dass es so bleichs ischt?
- Base* Es rahns isch es vo Ching uf gsy.
- Elisi* So ne rotfrächi Plätttere bigähren i ömu nid z wärde.
- Base* Der Ueli ghört jetz o zuen is.
- Elisi* Bongschur!
- Ueli* Grüessgott, Jumpfere!
- Base* U das ischt Vreneli! Mir hei s uferzoge u jtz wüsst i nid, wie n i s ohni ihns mache sött. ***Elisi schneidet Grimasse.***
- Joggeli* Ja, d Nase putze het men ihm chönne, aber übercho hätt mer nie e Rappe derfür.
- Base* Ach, du bischt doch o! Aber näht dir itz afe e Schluck Wy - du, Vreneli, chaischt jtz i d Chuchi, i überlah der d Sach. ***Vreneli ab.***
- Elisi* Un i muess mi ga schangschiere. ***Ab.***
- Bodenbauer* Es gfalligs Meitschi, das Vreneli.
- Joggeli* Aber chly es bös s: Es fät o lieber regiere weder diene: So Gsundheit, Vetter! ***Stossen an.*** Es soll rächt sy, aber er het o gchoschet derfür! Der Johanes het ne sälber gchouft im Wältsche hinger. -
- Ueli* ***steht auf.*** I wott no gah luege, ob ds Ross versorget ischt u de sötti ds Trögli ablege.
- Bodenbauer* U däich afe chly desumetrappe! ***Lachen.***
- Ueli* Ja, es nimmt mi scho wunger, wie das hie es Ygricht ischt.
- Base* Aber du söllsch mer de hüt no nüt wärche!
- Ueli* Hätt ömu säuft afen öppis chönne tue!
- Joggeli* He, he, dä wird de syner Heilige no erfahre. Die angere Dienschte hei ne scho itz uf der Pigge! - Der Charer wä sälber gärm Meischterchnächt worde. Weder, es isch besser, sie streckti d Gringe nid z fescht zäme, es ischt nie vom Guete.

- Bodenbauer* Fryli, we d Dienschte all gäge Meischter si un ihm z Leid wärche, de isch es gfählt. Aber we si zäme uneise, de geit s o nid vürersch. Es ischt doch gäng no wahr: Friede bout uf, Ufriede verzehrt.
- Base* Das hei mer öppe gnue erfahre. Ds Heimet isch die letschte Jahr i Abgang cho, öppis Usäglichs.
- Joggeli* Was es het gäh, isch i de Chöschte druffgange. Mir zweu si z alt u der Sach nimme Meischter. Im Hus isch es no gange, da het Vreni scho sy Sach gmacht. - Aber d Chnächte! - D Töibi het mi mängischt fascht ersteckt.
- Bodenbauer* Dass der nid eue Johanes heit gmacht zuezfahre!
- Joggeli* Das ischt e Heer! Versteit ke Brosme vom Bure, u sy Frou ischt e Hoffertnar. U üusersch Elisi hesch ja gseh! Das treit o ke Söimälchtere! Lismeler öppe chly am Schatte nah u lyret Sydefade vo eim Chlungeli uf ds angere.
- Base* Es ischt halt als Ching viel chrank gsy. Het men ihm öppis abwehrt, so het es yzoge u Chrämpf übercho, dass mersch meh weder einischt für gstorbnigs hei dännegleit. Mi het ihm deswäge halt z viel müesse nahlah. U de bin i brichtet gsy, besser Burelüt erzieji ihri Ching mit Wältsch u Broderie. Jitz hei mer wäger chly es Chrüz mit ihm, für ds Wärche isch es rein nüt. Nume zu dir gseit, Vetter!
- Bodenbauer* Es muess äbe a allne Orte öppis sy.
- Base* Ja wäger, es ischt scho derfür gsorget, dass me nid z hochmüetig wird. Mir si dür allszäme ganz i Verruef cho i der Glungge.
- Joggeli* Du wirscht is itz nid öppe o no e mingere Pürschtel aghäicht ha!
- Bodenbauer* Das wirscht mer doch nid zuetroue? Wen ech nid dienet wär mit ihm, so hätt der ne nid anerbotte. D Frou het si no dä Morge nid chönne dryschicke, dass ne ha la gah.

- Lesetext aus dem GrubHörBelp*
- Copyright by Hörbuchverlag E. F. Klett*
- Joggeli* Hei sie s so guet zäme chönne?
- Base* Was bischt du doch für ne donnschtigs Stürmi! Wosch der Vetter no toube mache!
- Bodenbauer* Biwahr! Das trifft mi nid. Luegit, d Sach ischt die, Ueli ischt bal dryssgährig u cha a me Burewäse vorstah mit Wärche u Handle wie der gwagletisch Buur.
- Joggeli* Jaja, Lohn heuscht er toll! Sächzg Chrone, u was der süscht no ygmärtet heit.
- Bodenbauer* Er verdienet ne. I der Glungge Meischterchnächt sy het e Nase u isch nid für jede. Aber er isch e Treue, d Sach isch de sicher vor ihm, mi chönnt ne i ds Chönigs Schatzchammere yche lah.
- Base* Selig siafe nümm dick gsäit.
- Bodenbauer* Aber dihr müsst ihm de chly freji Häng lah, süssch cha ner nid verrichte, was er möcht.
- Joggeli* So! I sött de schynt s gar nüt meh zur Sach säge u mer lah ne Mulchratte alege.
- Bodenbauer* Der Meischter blybscht du, aber ungerüstte muescht ne, dass er Rügge het an der, we s nötig ischt. Mir hei ne fasch gha wie pes eigets Ching, un es tät ihm de weh, wen er hie nume so ds Chnächtli müsst sy.
- Base* Mir wein ihm wäger zueha, was mügli ischt.
- Bodenbauer* I ha s zwar nid so gmeint, u Ueli begährti das o gar nid. Zuetroue söttit der ha zue n ihm, nume so chunnt s guet.
- Base* A üs soll s nid fähle.
- Joggeli* Nume nid z viel verspräche, de brucht me ou nüt z halte.
- Bodenbauer* I müsst mi wüesch trumpiere, we de nid versorget wärischt mit ihm.
- Joggeli* U wi het er s de mit em Wybervolch? Ischt er o so ne Fahri? Er macht mer no bal der Aschyn.
- Base* Eh, aber Joggeli! -

- Bodenbauer* Er ischt o i der Sach ke Untane. Er ischt die lengschi
Zyt nie usblibe z Nacht.
- Joggeli* Mi mues für di Sach o nid gäng vo Huus –
- Base* Du bisch doch gäng der glychlig Stürmi!
- Bodenbauer* **lacht.** Aber itz wott i no e Blick i Stall tue. **Steht auf.**
Bi bal gsperige worde.
- Joggeli* I chume mit der.
- Base* Aber vertampit ech nid z lang, mir wei de ässe! **Joggeli und Bodenbauer ab. Bei der andern Türe kommt Elisi herein, sehr aufgeputzt.** Aber, Elisi, was chunnt itz di a - a me heilige Wärtig der Sundigstaat az'lege!
- Elisi* We d Vrene däwäg ufzieht, cha ig allwäg nid derhör
cho wie nes Bättlermeitli. A was wett me de süscht
gseh, wär Tochter ischt u wär d Jumpfere?
- Base* Bisch e Ganggel! Dass du o nid chaisch tue wie anger
Lüt!
- Elisi* I bi äbe nid wie anger Lüt. Das hei mer d Herre im
Wältsche gäng gseit.
- Base* Dene Möffe hesch möge ablose!
- Elisi* Das si nid Möffe gsy!
- Vreneli* **öffnet die Türe.** Es wär agrichtet.
- Base* Sie chöme grad! Aber säg, wie het der der neu Chnächt
gfalle? Er schynt e manierlige z sy!
- Vreneli* I ha ne nid emal rächt gschouet.
- Base* Du Babeli! E selige Bursch muess me gschoue, we me
es jungs Meitschi ischt.
- Vreneli* Dihr müsst eim doch gäng necke, Base. I wott lieber
ume gah! **Ab.**
- Elisi* Da cha si itz säge! I ha allwäg wohl gseh, wie die dä
Ueli het gläcket mit de Ouge.
- Base* Bsinn di, was de seisch! We nume jedes Meitschi so
sufersch wär wie äs!
- Elisi* **wäffelet.** Wä - wä - wä - **Ab.**

- Lesen für einen guten Zweck
Copyright by Tüttewald Verlag GmbH in Belp*
- Base* Wo ke Verstang ischt, cha me kene mache. - ***Seufzt.*** Eh myn Kraft doch o! Wenn ha mi ächt däwág versündiget?
- Joggeli, Bodenbauer, Ueli treten ein.***
- Bodenbauer* Ja ja, da cha si de Ueli vertue, so ne grosse Hof git z luege u z wärche!
- Joggeli* Üse Elter het albe gseit, es sygi auwā chuum es Dotze vo der Grössi im Bärnbiet!
- Bodenbauer* Aber im Staal söttischt chly ändere, Vetter! Du hescht da Veh, wo ke Ufgang meh isch dranne!
- Joggeli* I ha nid viel uf em Ändere. Was me het, weiss me, was me überchunnt, nid.
- Bodenbauer* Ueli ischt e chennige mit de Rosse, dä stelltii der scho öppis Rächts yne.
- Joggeli* Gloube s scho, wen i tüfels brav tät zahlé. Däwág wär s no für mänge ke Kunscht!
- Base* ***nimmt Joggeli beim Arm.*** Du söttisch no cho d Hamme schnyde, Joggelit ***Im Hinausgehen.*** Dass de doch di ganz Zyt muesch gchäderet ha!
- Bodenbauer* U itze, Ueli- wie gfällt s der afe?
- Ueli* ***bedrückt.*** Thätt gueti Luscht, ds Trögli ume ufz'lege.
- Bodenbauer* Potz Tüüner! Du verlierscht der Muet no z rächter Zyt. Es gfällt mer o nid alls, i muess s säge. Aber für das bischt ja itz hie Meischterchnächt, dass es änderet, süscht hätt s de Joggeli mit eme mingere chönne.
- Ueli* Förchte nume, i chönn nid viel mache! Es düecht mi, es gang ganz e Gägeluft. Meinscht du, es hätt eine vo dene Trüssle, wo um ds Hus umeschlarpe en Antwort gäh, wen i öppis gfragt ha! Am liebschte hätt i grad es paar zum Gring zwickt.
- Bodenbauer* Grad e so wirscht nid dörfe dryfahre. Du muescht ds Hefti unvermerkt i d Finger näh. Säg d Sach i der Manier u gryf sälber am gröbere Ort a. Du muescht däm Züg chly abwarthe, vielicht hesch de grad gwunnigs

- Spiel. Sött s de z Trutz allem nid guete, nu, so cheisere
de einischt so rächt us, dass sie merke, wo s düre geit.
- Ueli* Hescht du die Sach gseh im Stall inne? Wenn ischt ächt
z letscht ghörig gmischtet worde? Bschüttlöcher si
meh weder voll, u d Gülle louft i Stall yche.
- Bodenbauer* De Chalber muescht de luuse, u d Schaf si viel z dick
inangere, d Lamqli verigle däwág.
- Ueli* U wie die de trösche, die halbe Chärne lah si drinne:
- Bodenbauer* Joggeli ma halt d Sach nimme gmeischtere u het schynt
s itz grad ganz Ungfehl gha mit de Dienschte.
- Ueli* Er isch aber o ne verdräite Siebechätzer!
- Bodenbauer* I ha dersch ja scho gseit, es syg nid guet mit ihm us z
cho. Aber dir troue n i s zue. Da chaischt itz grad di
Meischterstreich verüebe u zeige, dass de nid nume so
nes gradane Pürschteli bischt. Blyb ufrichtige u
fromme u lueg zur Sach, wie we si dyni wär. Sött s de
nid gah, so weischt, wo mer sy u dass de z allne Zyte
darfscht umecho.
- Ueli* Du söllisch ztusig Male Dank ha!
- Bodenbauer* D Meischterfrou isecht rächt, die ändereti mängs, we sie
chönnnt. Sie het gwiss o nes Verding näb em Joggeli u
däm abgschossne Chirbelestängel vo Tächter. Mach,
dass de gäng guet mit ihre z Schlaag chunnscht. Aber
nid esog dass Joggeli misstreue wird. Häb ihn für e
Meischter. We sie der hingerume wei z ässe u z treiche
gäh, so wehr ab, süscht chunnscht erscht rächt
zwüische Stuehl u Bänk u i Uglanz bi de angere
Dienschte.
- Base* **kommt herein.** Jtz chömit cho ässe, es ischt zwäg i der
Hingerstube!
- Bodenbauer* Du hättisch nid sölle Umständ mache, Base!
- Base* Mir gäh s, wie mersch hei -
- Ueli* Chönnt ou guet mit de angere ässe.
- Base* Nüt ischt. Du muesch gseh, dass d is wärte bischt! Du
weischt gar nid, wie hert ig uf di zelle! U wägem

Joggeli: - Är isch halt alte u isch nüt meh z ändere an ihm.

Ueli I ha der bescht Wille, dass es guet soll gah.

Vorhang

Leseprobe
Copyright by
TVE Teaterverlag Elgg GmbH in Belp

Zweiter Akt

- Johanes* **grossartig.** Wie gseit, Ätti: die jungi Chalbe choufe der ab! Das ischt es Prachtstier: Aber heusch mer de nid mit Uverstang:
- Joggeli* Jä, chönntisch mer nid zersch die zweu Guschi zahle - u d Maschtsöi - u ds Chirschiwasser - i cha nid gäng däwäg!
- Johanes* **lacht schallend.** Mach nid Sprüch: Dihr flotschit ja fei im Überfluss! I wett e Nar sy u no Wasser i Bach trage! He wohl, du gisch mer die Chalbe!
- Base* Ischt es die, wo Ueli uf em Bärn-Märit het kouft? Die tät ne däich de übel reue:
- Joggeli* Ja, die het unerchannt guet ta, die ischt scho drei Dublone meh wärt weder im Hustage.
- Johanes* Du hescht überhoupt bravi War, myseech! U dürhar en Ornig, dass me chönnt meine, es wär Sundig u nid i der Ärn. Du wirscht itz i dyne alte Tage no so rächt wölle der Chnoppf ustue, Ätti he?
- Joggeli* So, gfallt s der?
- Johanes* Myseech, es het alls ganz die anger Nase i der Glungge!
- Base* Mir hei äbe gar Gfehl gha mit em neue Meischterchnächt. Itz isch es Freud, derby z sy. Längszyt hei sie nie gmulche wie dä Summer - itz würde mer de d Ankehäfe a der Sichlete nid lär.
- Joggeli* Mi het ömel früecher o chönne bure! Er ischt mer nume wohl füürige. Das ischt gäng es tüfels Pressiere un es Gchär – er gheit mer am Änd die ganzi Glungge zungerobe. Bal wott er War ändere, bal Ross, de isch der Wärchzüg nümmre guet gnue. Ab em z Acherfahre ha n ihm afe d Poschtorng gseit, wo n er der Flueg däwäg teuf ache glah u der wild Härd alle obedruf gchehrt het. Der Mischt het er verlochet, dass es ne de öppe z Merika äne usewässeret. Der Mälcher u der

	Charer ha n i müesse uszahle, süscht wär er mer grad dervoglüfse.
<i>Johanes</i>	Da muess i jtz bim Tonner lache! Dä rühert schynt s angersch im Züügli, myseech! Jtz wirsch no bschuelet! Lacht.
<i>Base</i>	Dene zwene strube Pickle wirscht öppe nid wölle nachepläärel Jtz geit s öppe o wi ime ne Chrischtehus, sider dass die furt si. - U dass es Uelin mit em Wärche so dra glägen ischt, ischt doch nume üse Nutze.
<i>Johanes</i>	I ha glost wie ne Nar, wo s het gheisse, dihr chönnit scho d Sichlete ha! Süscht syt er gäng vierzäche Tag hingerdrinne gsy, myseech: Dä macht schynt sare Sach nid zwe Tag, wen er sche i eim cha mache.
<i>Joggeli</i>	I ha nie mit de angere bigährt fertig z.sx. Ha albe gseit, churzi Haar sygi grad bürschtet. Aber jtz wird s uf ene neu Mode sölle gah. Är wird mer nume wohl boghälsige!
<i>Base</i>	Du hesch es gäng glych, die guete Chnächte vertrybscht u die schlächte förchtisch!
<i>Johanes</i>	Wen er der öppe vürige ischt, so dinge ig ne, i hätt grad e Stauchnächt nöfig, ha der anger geschter furtjagt.
<i>Base</i>	erschrocken. Eh herjeses, Johanes, dass wirscht is nid wölle anemache! Bisch doch e Göhl, Joggeli.
<i>Joggeli</i>	aufgeregt. Das ischt es tüfels Gstürm! -Wär het de es Wort gseit, i woll ne nümme!?
	Elisi und Trinette kommen, spienzeln ihre Kleider und beschauen sich mit hämischen Blicken.
<i>Johanes</i>	Heit der itz ustüfftelet, weli von ech die vürnähmer Mouggere cha mache? U weli dass dümmer cha tue!?
<i>Trinette</i>	Aber Johanes, was hesch du afe für entsetzlich Maniere, terribel!
<i>Elisi</i>	My Ma muess de fyner tue, e selige Grobian wett i nid!
<i>Trinette</i>	giftig. Mach afe, dass de e selige überchunscht -

- Johanes* Wär wett ächt di näh! Du gsesch ja gäng us wie nes Chrutblatt im Winter! **Lacht.**
- Elisi* Dihr cheut itz de grad luege, ob i nid tuei härte. - I tue allwäg nid ohni Ma verräble, nume dass ds Gäld a eim Hufte blybt!
- Base* Chäret doch nid gäng:
- Trinette* Da fählt es halt a der Erziehig, Schwiegermamma! Da sy mir doch de es Bitzeli andersch erzoge worde.
- Johanes* Fyn erzoge, ja my Seeu! Aber chumm, Ätti, mir wei itz z Bode handle mit der Chalbe - **Zieht ein Papier aus der Busentsche.** U de hätt i hie ume so n es Wächseli, der Wyhändler wott mi aber drücke.
- Joggeli* **aufgeregzt.** Los, i cha nid gäng, weiss Gott nid!
- Johanes* **schlägt ihm auf die Achsel.** Chumm itz, Papa, mir wei däm Wybergstürm nid lenger ablose.
- Beide ab, Joggeli widerwillig.*
- Elisi* Jtz het me s aber gseh -
- Trinette* My Mueter git mer o immer und stets Gäld, wen i heigah. Zletscht Mal het sie mer beid Chittelseck mit Neutaler gfüllt, Trinetteli söll nid müesse Mangel lyde, u wo das Syg gsy, syg de no meh. - Mir chönnti s nid machen, wen i nid gäng hei chönnt gah reiche.
- Base* Was machtet der de ömel o mit däm viele Gäld? Johanes ischt ja gäng uf der Truese.
- Trinette* Dihr wüsset halt hie i euem Näbeusnäscht nid, was Läbe ischt. So ne Wirti muess halt Twalette ha, we so viel frömd Herre us allne Ländere chöme. Es het mer scho mänge gseit: Oblischee, Frou Wirti, Dihr würdet wie länger, wie schöner!
- Elisi* U mir het e schöne Heer mit eme Schnouz gseit, myner Bäckli sygi so fyn wie nes sametigs Seckli voll Nidle.
- Trinette* Was woscht doch dene Möffe gloube, die lüge wie druckt.

- Elisi* Mir gah itz de i Gurnigel, Müeti un ig. I weiss nume no nid, ob i bürsch oder stedtisch soll gah.
- Trinette* Das ischt no kumod, we Vater u Mueter zahle. Hürat nume, es bingt di de scho hingere.
- Base* Es ischt mer schrökli zwider - i dä Gurnigel, aber we s Elisin guet tuet.
- Elisi* I ha drum gäng Härzbrönne! Uh, was i afe tokteret ha!
- Trinette* Aber de ig! I bi scho zu sächsne Döker u dreine Profässer gsy. I müess mer schützli borge, süscht wärdi nid alt.
- Ueli* **herein.** Jtz wohl, jtz het s grückt! Grad hei mer di letschte Garbe bunge. **Zu den Damen.** Weit der is öppe no cho hälfe uflade?
- Trinette* **schnippisch.** Was meinsch du eigelech! **Ab.**
- Base* Du nimmsch gwüss hurti es warms Gaffee, isch gäng no ds Beschte gäge Durscht. **Ab.**
- Ueli* **ihr nachrufend.** Nid nötig, ha o gar ke Zyt, sött jtz mit de Wäge fahre - **Will ab.**
- Elisi* **fasst ihn am Arm, hält ihm ein Stück Torte hin, zärtlich.** Lue, hesch Glück, dass Trine nid alls furtgruum het, oh, die trönnnt Bitze ab!
- Ueli* **ablehnend.** I ha gwüss ke Hunger, Elisi!
- Elisi* Nimm doch! **Schiebt ihm ein Stück Torte in den Mund.** Vo der Vrene nähmtisch ömu! **Streichelt ihm über die Stirne.** Üh - wie hesch du gschwitzt! - Arme Ueli! Un i ha ganz chalt Backe, gspüür - **Drückt Uelis Hand an seine Backe.**
- Ueli* I muess itz gah. -
- Elisi* I gloube itz de afe, i syg der gar nüt lieb, süscht tätischt öppen es Gleich! Gi mer doch es Müntschi!
- Ueli* **verlegen.** Es chönnt s öpper gseh - u i wett nid, dass mer i ne Lärme chämi. D Lüt rede süssch scho gnue.
- Elisi* So sölle si, we du mi nume gärn hesch!

- Leseprobe © CANTUS Verlag Egg/Gmunden*
- Ueli Jä, isch es der dedüruse ärscht? I wett mi de nid lah zum Löhl mache! U eune wär es vielleicht o nid rächt.*
- Elisi Dene wett i s reise, we sie wüescht täti! - I wott di eifach!*
- Ueli So säg safe der Mueter.*
- Elisi Zerscht no i Gurnigel, süscht macht sie der Chopf, u wott nümme gah - **Schiebt ihm wieder Torte in den Mund.** Jtz hescht mer gäng no kes Müntschi g gäh!*
- Ueli Los - es chunnt öpper! -*
- Der Bodenbauer ist an's offene Fenster getreten. Elisi kreischt und springt davon.***
- Bodenbauer etwas ironisch. Du bischt schynt s ghörig erwarmet! Gottwilche!*
- Ueli verlegen. Wo chunnscht itz du här, Meischter?*
- Bodenbauer I ha i der Nechi öppis gha z verrichte. Jtz ha n i gschwung wölle cho grüesse u luege, wie s der gang. Mir hei di nid vergässe -*
- Ueli Ig euch o nid.*
- Bodenbauer Hescht öppe im Sinn, gly einisch i ds lange Jahr z dinge(z hürate)?*
- Ueli Wär seit öppis so? Sichersch isch da no nüt.*
- Bodenbauer Oppis wird mit Schyn doch a der Sach sy! Verbingscht ächt nid der lätz Finger? So nes bleichsüchtigs wi nes isch.*
- Ueli Der Dokter heig gseit, es besseri de scho, we s hürati.*
- Bodenbauer Höcklet s gäng no so desume u wärchert nüt?*
- Ueli zögernd. Wärche tuet s scho nid grad viel! Aber we s der Hof überchunnt, so chönnt me Jumpferi ha bis gnue. Elisi bruchti de nume nachez'luege.*
- Bodenbauer Für nachez'luege sött me d Sach äbe sälber o verstah. Los, Ueli, die Sach gfällt mer nid, du chönntischt di wüescht verrächne.*
- Ueli Aber das wär doch es Gfehl für so nes arms Bürschli! Es überchunnt einischt meh weder hunderttusig Pfung!*

Begeistert. U de dä Hof! Mit däm ischt öppis z mache,
wen er rächt gwärchet wird. Es git ring zächetusig
Garbe!

Bodenbauer Das ischt viel, u Rychtum ischt e schöni Sach. Aber
wen i chönnnt useläse - entweder e gfreute Hof u ne
ungfreuti Frou derzue, oder kes vo bedne - i hätt mi gly
usbsunne.

Ueli Aber, du hescht mi doch brichtet, i soll huse, dass i zu
öppis chömm! Mi syg nüt, we me nüt heig.

Bodenbauer Das säge n i no hüt! Aber ds Glungge-Elisi wett i nid, u
we s die ganz Wält chönnnt erbe. Jä jetz, es isch ja dy
Sach. We d mer nid so lieb wärischt, hätt i nüt gseit.
Aber vergiss nid - du hescht doch o no nes Gmüet un e
Seel. Meinscht nid, das müsst z churz cho näb ere
settige Frou? U däich, wie das einisch e Mueter wird
gäh!

Ueli Du muescht mi begryffe, Meischter! I möcht nid myr
Läbtig diene un unger frömde Lüte sy. A me Ort
deheime sy, das düecht mi d Schönste, wo s cha gäh. I
bi ja nüt weder en arme, verschüpfte Bueb gsy. Ersch
bi dir bin i für ne Möntsch agluegt worde. Bi dir ha n i
o ggeh, was das ischt: eigete Härd u eigete Meischter.
Das liegt mer sider gäng im Sinn. Aber gloub mer: i
hätt nie drädäicht, für mi hie yzwybe, we mer ds Elisi
nid so wär etgäge cho. UF der angere Syte ggeh n i
sälber, dass es nid e gfreuti Frou git. I weiss mer
mängisch sälber nid z rate.

Bodenbauer Es freut mi, dass de ufrichtige bischt gäg mi. -I wär
süscht bal irr worde an der. Jtz cha di verstah. Un will
der itz o no säge, was i für Brattige ha gmacht. I ha
gäng däicht, du häratischt das Vreneli, u de hätt ech
wölle für nes Läche luege. I ha da so myner Gedanke!

Ueli A ds Vreneli darf i gar nid sinne. Das ischt es eigets
Meitschi; das wott überhaupt e kene. Es soll s nid eine
wölle arühre, ömel i troueti mer nid.

Bodenbauer Du seisch. Öppe viel wird s nid gäge di ha.

Ueli Nenei, es isch scho rächt mit mer. Es het ja o ne schwäre Stang hie, u isch doch gäng guet ufgleit u z friede.

Bodenbauer Also: Bsinn di guet. Es het si scho mänge verdrähte Chnopf ganz ungsinnet glöst. U jtz läb wohl - ***Er geht.***

Vorhang

Leseprobe
Copyright by
TVE Teaterverlag Elgg GmbH in Belp

Dritter Akt

Oben am Tisch ist für zwei Personen gedeckt. Unten sitzt Vreneli und näht. Ueli schaut ihm zu.

- Ueli* Het es di nid o duecht, mir heigi nie so grückt? Ömel mir ischt ds Wärche längszyt nie so ring g gange. Es ischt mysex alls glüffe wie am Schnürli. Der Bur het geschtert afe gchlagt, mi chömm ja gar nimme nache! Es syg grad, wie we me ohni Schleipftrog tät über ne Stutz abfahre. Das chönn ihm s neue nüt.
- Vreneli* Dä ischt si drum gwahnet, zerscht e halbi Ewigkeit z wärweise, gäb er öppis befiehlt.
- Ueli* Aber du hescht gwüss wohl bös gha, hescht gmageret, duecht mi! Oder bischt chrank?
- Vreneli* I wüsst nid, was mir fahle wett.
- Ueli* Du hättischt drum d Jumpferi nid gäng bede sölle use schicke, dass die ganzi, schwäri Hushaltig dir bbliben ischt.
- Vreneli* Das het mir doch nüt gmacht; es ischt mer g gange wie dir. D Arbeit ischt mer nume so us de Fingere zibe.
- Ueli* Hör doch ate chly schnurpfe, so cha me o mit der rede!
- Vreneli* I wett drum no gärn fertig mache, sie cheu arücke, wenn s ischt.
- Ueli* Es duecht mi, die vierzäche Tag sygi neue gly ume gsy-
- Vreneli* Derby bisch fasch vergitzlet vor Längizyti! - Am liebschte wärischt i lange Schritte em Gurnigel zue.
- Ueli* Warum fascht mi itz a plague? Itz bischt doch gäng so ne freins, gäbigs Vreneli gsy.
- Vreneli* U itz chunnt de es hoffärtigs, rychs Elixi hei. Da achtet si myne de niemer meh.
- Ueli* I cha nid lose, we du so redscht. Du weischt doch wohl, wie n i viel uf der ha: Was wett me o i der Glungge, we du nid wärischt.

- Vreneli Lang blyben i allwäg nimme. Unger Elisin cha n i nid diene. Bis jtz bin i no der Base z lieb bblibe.
- Ueli Aber Elisi ma doch der Sach nid vorstah - sövli brings, wie s ischt. U de isch es einewäg nid wärchiger Art.
- Vreneli E hundertusigpfündigi Glunggetächter brucht däich nid all Tugete z ha. -
- Ueli Was isch jtz mit der?
- Joggeli **öffnet die Türe.** Ghört eigetlich niemer nüt? Jäso mi het mit Schyn wichtigersch z tüe! **Ab.**
- Vreneli Hurti gang lüpft Elisin vom Schesli ache!
- Ueli I hätt gar nid glaubt, dass die scho chämi! **Ab.**
- Vreneli **traurig, aber ohne Pathos.** Müeti hätt mi sölle mit ihm näh, wo s gstorben ischt! **Ermannt sich und geht den Ankommenden entgegen.**
- Base, Elisi im Reisestaat. - Joggeli.**
- Base Gottwilche, Vreneli: - Isch es guet ggange deheime?
- Vreneli Grüessgott, Base! Sovil i weiss, ischt alls i der Ornig.
- Base I ha schröcklig blanget! We me scho mängs z muggle het, am schönschte isch es glych deheime.
- Vreneli nimmt ihre Sachen ab.**
- Joggeli Du hesch es erzwängt für i dä Gurnigel ueche!
- Base Bhuetis, d' Sach ischt meh weder nume rächt gsy! Mir hei es Herreläbe gfuehrt, i ha mi ganz gschinert.
- Elisi U i ha mi fascht hingersinnet, wo mer hei müesse xpappe. Das wird mi itz de düeche, wieder i der alte Hütte inne! Seh Vreni, nimm mer de öppe mys Bagasch ab, es chunnt der o nüt z Sinn! Da si de di Chammeremeitli im Gurnigel angersch gsy!
- Vreneli **ruhig.** I ha drum nid für Chammeremeitli gstudiert. I hät de Gaffe zwäg, Basel
- Base Du bischt doch gäng ds beschte Vreneli! - Uf dä ha mi scho lang gfreut. **Sitzt behaglich ab.** Einstwyle bringt mi niemer meh vo Hus.

- Elisi* U i cha mi fascht nid dryschicke, dass das schöne Läbe söll ufhöre.
- Joggeli* Faht das tüfels Gchäär scho ume a!
- Elisi* U ds Blage u ds Hässle schynt s o. - Es ischt afe guet, währt s nimme lang! - Aber i muess mi ga schangschiere - i dämm abgschossene Züg darf i nid sy, we im Fall no sött Visite cho! **Lacht vielsagend. Ab.**
- Vreneli schenkt Kaffee ein.**
- Joggeli* Es ischt gäng no der glych Stock.
- Base* Es git itz de scho ne Änderig - du wirsch no lose!
- Vreneli* Mädi u ig trage no d Gufere i ds Stöckli. **Ab.**
- Base* Machit nume. **Trinkt.** Wohl, er het di rächti Chuscht! - Sie hei ja erschröcklig agwängt i däm Gurnigel, aber i hät wäger die Plättleni mängisch gärn glaa für nes guets Gaffee.
- Joggeli* Ömel i frage däm Gsüff nid viel dernah.
- Base* Nimm itz glych es Chacheli voll, mi cha derby besser zäme brichte. Ja, we das chätzigs Züg nid wär, es hätt mi no viel meh gfreut, heiz'cho. I darf dersch fascht nid säge.
- Joggeli* Was Tüfels ischt de? Däich öppe ds Gäld alls brucht, was angersch!
- Base* We mer ds Gmüet so liechts wär wie der Gädseckel, de wär s mer wohl. Weder das ischt z verschmärze, es ischt oppis angersch! Elisi het eine. År chunnt allwäg no hüt für is cho frage.
- Joggeli* Da werden i wohl o no es Wörtli z säge ha! U de Johanes! Was gloubsch, was de dä seit! Dä verschlaht vorewägg jedem d Scheiche, wo chunnt cho zuecheschmöcke.
- Base* Jä, da git s däich nimme viel z ändere, der Chnöpf ischt gmacht. Wo me s mir het gseit, ischt scho alls richtig gsy.

Als Leseprobe steht jeweils nur der halbe Text zur Verfügung.

Wenn Sie den vollständigen Text lesen wollen, bestellen Sie diesen zur Ansicht direkt bei uns.

Freundliche Grüsse



teaterverlag elgg in Belp GmbH
im Bahnhof
3123 Belp

Tel.: 031 819 42 09
Fax: 031 819 89 21

E-Mail: information@theaterverlage.ch

Web: www.theaterverlage.ch